



LATOUR VEYER 15 ME 2013
PE ANONS RWAYONM ZEOVA

1-7 Zilyet

**Akonplir ou rol
konman en predikater**

PAZ 3 KANTIK: 103, 102

8-14 Zilyet

**Eski ou “zele pour
fer dibyen”?**

PAZ 18 KANTIK: 108, 93

Edisyon gro lekritir

PARTI 1

LARTIK LETID

■ Akonplir ou rol konman en predikater

Ki en predikater i fer? Sa lartik i reponn sa kestyon e montre akòz dimoun i bezwen antann sa bon nouvel. I osi eksplike ki mannyer nou kapab reisi akonplir nou rol konman en predikater.

■ Eski ou “zele pour fer dibyen”?

Sa lartik i donn de fason ki mannyer nou kapab atir dimoun ver Bondye ler nou “zele pour fer dibyen.” (Tit 2:14) Premyerman par nou travay predikasyon e dezyenmman, atraver nou bon kondwit.

Akonplir ou rol konman en predikater

“Fer ou travay konman predikater levanzil, e ranpli ou devwar dan servis Bondye.”—2 TIM. 4:5.

KI OU POU REPONN?

Ki en predikater i fer?

Akoz dimoun i bezwen antann sa bon nouvel?

Ki bann predikater ki efikas i fer?

EN PREDIKATER oubyen evanzelizater i en dimoun ki anons bon nouvel. Zeova i sa premye Evanzelizater e sa enn pli enportan. Zis apre ki nou premye paran ti rebele, Zeova ti anons en bon nouvel konmkwa sa serpan, an-dotmo, Satan oubyen Dyab pou ganny detrir. (Zen. 3:15) Diran plizyer syek ki'n pase, Zeova in enspir bann zonm fidel pour ekrir bann

1. Akoz Zeova i kapab ganny apele sa premye Evanzelizater e sa enn pli enportan?

detay konsernan lafason ki bann repros ki'n ganny anmennen lo son non pou ganny retire, lafason ki bann domaz ki Satan in koze pou ganny repare e lafason ki imen i kapab reganny sa sans ki Adan ek Ev in perdi.

2 Bann lanz osi i bann evanzelizater. Zot anons bon nouvel e ed lezot pour propaz sa bon nouvel. (Lik 1:19; 2:10; Akt 8:26, 27, 35; Rev. 14:6) Kwa ki kapab ganny dir konsernan Misel arkanz? Ler i ti lo later konman Zezi, i ti kit legzanp pour bann predikater imen. Anfet, Zezi ti viv pour anons sa bon nouvel.—Lik 4: 16-21.

3 Zezi ti donn lord son bann disip pour vin bann predikater. (Mat. 28:19, 20; Akt 1:8) Pol ti ankouraz Timote an dizan: “Fer ou travay

2. (a) Ki rol bann lanz i zwe an rapor avek predikasyon? (b) Ki legzanp Zezi in kite pour bann predikater?

3. (a) Ki bon nouvel nou proklanm partou? (b) Ki kestyon ki enteres nou konman bann predikater?

konman predikater levanzil, e ranpli ou devwar dan servis Bondye.” (2 Tim. 4:5) Konman disip Zezi, ki bon nouvel nou anonse partou? Sa bon nouvel i enplik sa laverite ankourazan ki Zeova, nou Papa ki dan lesyel i kontan nou. (Zan 3:16; 1 Pyer 5:7) En fason enportan ki Zeova i demontre son lanmour pour nou i atraver son Rwayonm. Alor, nou kontan pour dir lezot ki tou sa ki soumet anba sa Rwayonm, obeir Bondye e fer sa ki drwat i kapab vin son zanmi. (Ps. 15:1, 2) Anfet, i dan plan Zeova pour elimin tou soufrans. I pou osi retir doulè ki bann leksperyans lepase i anmennen. Pa sa i en bon nouvel! (Iza. 65:17) Vi ki nou bann evanzelizater, annou egzamin larepons sa de kestyon enportan: Akoz i enportan pour bann dimoun antann sa bon nouvel ozordi? Dan ki fason nou kapab reisi akonplir nou rol konman bann predikater?

AKOZ DIMOUN I BEZWEN ANTANN SA BON NOUVEL?

4 Zis fer krwar ou ganny dir ki ou papa in abandonn ou, ensi ki ou fanmir antye. Meton dimoun ki dir zot ti konn li, i dir ki i pa ti abor-dab, i ti rezerve e kriyel. Serten i menm kapab fer ou krwar ki i pa vo lapenn rod kontak ankor avek li akoz i'n mor. Anfet, bokou dimoun i ganny dir preski menm zafer konsernan Bondye. Zot ganny ansennyen ki Bondye i en mister, personn pa kapab konn li ouswa i kriyel. Par egzanp, serten sef relizye i dir ki Bondye pou met bann move dimoun dan en landrwa kot zot pou ganny pini e tourmante pour touzour. Lezot i dir ki Bondye i responsab pour bann soufrans ki dezas natirel i anmennen. Menm si sa bann levennman i touy bon dimoun ensi ki sa ki move, zot ganny dir ki tou sa la i en pinisyon sorti kot Bondye.

4. Ki fo zistwar dimoun i rakonte parler konsernan Bondye?

5 Lezot i dir ki Bondye pa egziste. Anliny avek sa, reflexir lo teori evolisyon. Bann ki siport sa teori i dir ki lavi in vin an egzistans par azar. Zot dir ki napa en Kreater. Serten in menm dir ki bann imen i zis en zannimo, e se pour sa rezon ki i pa drol ki serten i azir konman zannimo. Zot ensiste ki i normal pour bann ki pli for fer soufer bann ki feb. Alor, i pa drol ki bokou i krwar ki i pou touzour annan lenzistis parmi nou. An touka, bann ki met konfyans dan evolisyon napa okenn lespwar.

6 Me, san okenn dout, sa teori lo evolisyon e bann fo krwayans i osi responsab pour soufrans ki limanite pe eksperyanse pandan sa bann dernyen zour. (Rom. 1:28-31; 2 Tim. 3:1-5) Sa bann lansennyman imen pa'n donn okenn vre bon nouvel eternal. Plito, parey zapot Pol i fer vwar, “zot lespri i dan fernwanr. Zot napa okenn par dan sa

5, 6. Ki lefe sa teori lo evolisyon ek bann fo lansennyman in annan lo bann dimoun?

nouvo lavi ki Bondye i donnen.” (Efe. 4:17-19) An plis ki sa, sa teori lo evolisyon ek bann fo lansennyman i anpes dimoun aksepte sa bon nouvel ki sorti kot Bondye.—*Lir Efezyen 2:11-13*.

7 Pour arive rekonsilye avek Bondye, bann dimoun i devret premyerman konvenki ki Zeova i egziste e ki i annan bon rezon pour apros avek li. Nou kapab ed zot ganny sa konnesans par ankouraz zot pour etidye kreasyon. Kan zot etidye kreasyon avek en lespri ouver, zot aprann lasazes Bondye ek son pwisans. (Rom. 1:19, 20) Dan nou zefor pour ed bann dimoun develop en ladmirasyon kan zot reflexir lo sa ki nou Gran Kreater infer, nou kapab servi brosir *Was Life Created?* ek *The Origin of Life—Five Questions Worth Asking*. Kantmenm sa, sa bann ki zis etidye kreasyon pa pou trouv larepons serten kekyon enportan dan lavi parey: Akoz Bondye i les nou soufer? Ki

7, 8. Dan ki fason nou kapab ed dimoun pour pli byen konpran sa bon nouvel?

plan Bondye pour later? Eski Bondye i enterese avek mwan endividelman?

8 Sel fason pour dimoun konpran klerman bon nouvel konsernan Bondye ek son plan i atraver en letid Labib. Nou annan en gran privelez pour ed lezot trouv larepons zot kestyon, pa i vre! Me, pour arive tous leker bann ki ekoute, nou bezwen fer plis ki koz avek zot lo bann fe, nou devret persyad zot. (2 Tim. 3:14) Si nou swiv legzanp Zezi, nou pou kapab pli byen persyad lezot. Akoz i ti byen reisi dan sa domenn? En rezon i akoz i ti byen servi kestyon. Ki mannyer nou kapab imit li?

BANN PREDIKATER KI EFIKAS I SERVI BYEN KESTYON

9 Parey Zezi, akoz nou devret servi kestyon dan predikasyon? Egzamin sa senaryo: Ou dokter i dir ou ki i annan en bon nouvel pour ou. Ou kapab geri si ou fer en gro loperasyon. Petet ou pou

9. Ki nou devret fer si nou anvi ed dimoun spirityelman?

krwar li. Me, si i dir ou sa san ki i menm demann ou ki ou gannyen? Sirman ou pa ti pou annan konfyans dan li. Menm si i en bon dokter, i bezwen demann ou kestyon e ekout ou ler ou eksplik li ou bann sentonm avan ki i kapab ed ou. Pareyman, si nou anvi ed bann dimoun pour aksepté sa bon nouvel lo Rwayonm Bondye, nou devret konnen konman pour servi kestyon dan en fason efikas. Nou pou pli kapab ed zot apre ki nou konpran byen zot leta spirityel.

10 Zezi ti konnen ki si nou swazir byen kestyon, sa pa zis ede pour sa ansenyan konn son zelev, me osi pour ed li partisipe. Par egzanzp, kan Zezi ti oule ansenny son bann disip en leson lo limilite, i ti premyerman demann en kestyon ki fer refleksi. (Mark 9:33) Pour ansenny Pyer konman pour rezonn lo bann prensip, Zezi ti demann li en kestyon kot i ti pou bezwen swazir larepons korek.

10, 11. Ki nou kapab akonplir si nou imit lafason ki Zezi ti ansennyen?

(Mat. 17:24-26) Dan en lot moman, kan Zezi ti anvè konn sa ki ti dan leker son disip, i ti demann zot en seri kestyon pou konn zot pwennvi. (*Lir Matye 16:13-17.*) An servan kestyon e atraver sa ki i ti dir, Zezi pa ti zis ed zot konpran bann fe. I ti tous zot leker, e motiv sa bann dimoun pou azir an armoni avèk sa bon nouvel.

11 Nou kapab aprann omwen trwa keksoz kan nou imit Zezi par servi kestyon dan en fason efikas. Nou konpran konman pou ed bann dimoun pli byen, konman pou sirmont lobzeksyon e an-senny bann ki annan limilite byenfe ki zot menm zot kapab gannnen. Reflesir lo sa trwa sityasyon ki pou montre nou konman pou byen servi kestyon.

12 *Premye sityasyon:* Konman paran, ki ou ti pou fer si ou zanfan adolesan i dir ou ki i pa konnen konman pou defann son krwayans lo

12-14. Ki mannyer ou kapab ed ou zanfan pou pli konfidan kan i pe proklanm sa bon nouvel? Donn en legzanp.

kreasyon avek son kanmarad lekol? San okenn dout, ou pou anvi ed li annan konfyans ki i pou kapab anons sa bon nouvel. Alor, olye kritik li ou-swa konsey li deswit, akoz ou pa imit Zezi e demann li kestyon pour ou konn son pwennvi? Konman ou kapab fer sa?

13 Apre ki ou'n lir avek li en bout dan sa brosir *The Origin of Life—Five Questions Worth Asking*, ou kapab demann li ki pwen ladan ki fer reflesir plis. Ankouraz li pour esey vwar kwa ki'n persyad li pour krwar dan en Kreater e akoz i anvi fer lavolonte Bondye. (Rom. 12:2) Ed ou zanfankonpran ki son rezon pa neseserman bezwen parey avek sa ki pour ou.

14 Eksplik li ki i kapab fer parey zot in fer ler i pe koz avek son kanmarad lekol. Setadir, i kapab repas lo serten fe avek sa zelev e apre demann li bann kestyon pour konn son pwennvi. Par egzanzp, i kapab demann son kanmarad lekol pour

lir sa bwat lo paz 21 dan brosir *Origin of Life*. Apre sa, ou zanfan i kapab demande, ‘Eski i vre ki DNA i annan sa kapasite pour stok plis lenformasyon ki okenn konpiter ki egziste dan sa lemonn teknoloji?’ Sirman sa kanmarad lekol pou dir wi. Apre, ou zanfan i kapab dir, ‘Si bann enzyenyer konpiter ki annan lespri pa kapab atenn sa bi, ki mannyer en keksoz ki napa lespri i kapab fer sa lo li menm?’ Pour ed ou zanfan santi li pli konfidan pour koz avek lezot lo son lafwa, ou kapab fer bann demonstrasyon avek li tanzantan. Si ou montre li konman pour servi kestyon dan en fason efikas, ou pou ed li akonplir son rol konman en predikater.

15 *Dezyenm sityasyon:* Dan predikasyon, sirman nou zwenn dimoun ki dir Bondye pa egziste. Par egzanp, en dimoun i kapab dir nou ki i pa krwar dan Bondye. Olye aret konversasyon

15. Konman nou kapab servi kestyon pour ed en dimoun ki pa krwar dan Bondye?

lanmenm, avek respe nou kapab demann li konbyen letan i fer depi ki i santi koumsa e kwa ki'n fer li annan sa kalite pwennvi. Apre ki ou'n ekout son larepons e felisit li pour son refleksyon lo sa size, ou kapab demann li si i pou mal pour en dimoun lir en lenformasyon ki montre ki imen in ganny kree. Si sa met lakour i annan en lespri ouver, i pou sirman dir ki i mal pour pa egzamin bann levidans parey. Apre sa, nou kapab ofer swa brosir *Was Life Created?* oubyen *The Origin of Life—Five Questions Worth Asking*. Kestyon ki ganny demande avek respe ek bon zizman i kapab parey en lakle ki ouver leker sa dimoun pour ki i aksepte sa bon nouvel.

16 *Trwazyenm sityasyon:* Kan pe kondwir en letid Labib, petet nou senpleman kapab les sa etidyan reponn dapre larepons ki dan sa piblikasyon ki nou pe etidye avek li. Me, si nou

16. Akoz nou pa devret satisfe zis avek larepons ki nou etidyan i lir dan sa piblikasyon ki i pe etidye?

fer sa, nou kapab anpes sa etidyan progrese. Akoz? Parski en etidyan ki reponn san medito lo son larepons pa pou annan bann rasin ki profon spirityelman. I kapab fasilman vin parey en plant ki sek desito ki i rankontre lopoziyon. (Mat. 13:20, 21) Pour evit en tel rezilta, nou bezwen demann nou etidyan ki mannyer i santi anver sa ki i pe aprann. Esey vwar si i dakor avek pwen ki pe ganny fer resorti. Pli enportan ankor, demann li akoz i dakor ouswa pa dakor. Apre sa, ed li pour rezonn lo bann verse Labib pour ki a lafen di zour i kapab tonm lo sa bon konklizyon li menm. (Ebr. 5:14) Si nou servi byen kestyon, bann dimoun ki nou ansennyen pou vin pli for dan laverite e zot pou kapab reziste sa bann ki fer tou pour opoz zot ouswa anbet zot. (Kol. 2:6-8) Ki lezot keksoz nou kapab fer pour akonplir nou rol konman en predikater?

BANN PREDIKATER KI EFIKAS I ED KANMARAD

17 Zezi ti anvoy son bann disip prese de par de. (Mark 6:7; Lik 10:1) Plitar, zapot Pol ti koz lo bann “kanmarad travay” ki ti’n “konbat akote [li] pour fer konn levanzil.” (Fili. 4:3) An armoni avek sa model, an 1953, bann proklanmater Rwayonm ti konmans swiv en program formasyon pour ed lezot dan predikasyon.

18 Kan ou akonpany en lot Kretyen dan predikasyon, ki mannyer zot kapab travay konman en lekip? (*Lir 1 Korentyen 3:6-9.*) Dan ou Labib, rod bann verse ki ou konpanyon pe servi. Get ou konpanyon ek sa met lakour ler zot pe koze. Swiv sa konversasyon atantivman zis an ka i neserer pour ou ed ou konpanyon sirmont en lobzeksyon. (Ekle. 4:12) Me, atansyon! Fer zefor pour reziste sa tandans pour enteronp ou konpanyon kan i pe servi diferan pwen pour ed sa met lakour

17, 18. Kan nou akonpany en dimoun dan predikasyon, ki mannyer nou kapab travay konman en lekip?

rezonnen. Si non, ou riske dekouraz ou konpanyon e konfiz sa met lakour. Par ler, i kapab apropiye pour partisip dan sa konversasyon. Me si ou anvi dir en keksoz, fer zis enn oubyen de pti komanter. Apre, les ou konpanyon kontinyen koze.

19 Ki mannyer ou ek ou konpanyon i kapab ed kanmarad anmezir zot al kot en lot lakaz? Akoz ou pa profit sa letan pour koz lo fason ki ou kapab amelyor ou prezantasyon? Fer atansyon ki ou komanter lo bann dimoun dan sa teritwar pa dekourazan. Pareyman, pa bezwen koz an mal lo lezot proklanmater. (Prov. 18:24) I byen pour rapel ki nou tou nou bann vaz later. Zeova in demonstre en gran labonte anver nou par donn nou sa responsabilite pour anons sa bon nouvel ki parey en trezor. (*Lir 2 Korentyen 4:1, 7.*) Alor, annou demontre lapresyasyon pour sa trezor par fer tou nou posibil pour akonplir nou rol konman bann predikater.

19. Ki nou devret rapel e akoz?

Eski ou “zele pour fer dibyen”?

“Zezi-Kri, . . . i’n donn son prop lavi pour nou, pour . . . pirifye nou konman en pep ki apartenir a li, en pep zele pour fer dibyen.”—TIT 2:13, 14.

KI OU POU DIR?

Akoz ou konsider li en loner pour zele pour fer dibyen?

Ki mannyer Danyel 2:41-45 i ed nou konpran lenportans pour devoue dan minister?

Eksplike ki mannyer kondwit Kretyen i atir lezot ver vre ladorasyon ek Zeova.

BOKOU dimoun i konsider li konman en loner pour ganny en pri aköz zot lareisit. Par egzanzp, serten in ganny Pri Nobel aköz zot ti fer tou pour etablir lape ant bann nasyon ouswa parti politik ki pe lager antre zot. Me, ki pli gran loner i annan ankor ki ganny anvoye par

1, 2. Ki loner spesyal Temwen Zeova i annan e ki mannyer ou santi anver sa loner?

Bondye konman bann anbasader ouswa reprezantan pour ed bann dimoun annan en relasyon anpe avek zot Kreater!

2 Konman Temwen Zeova, nou annan sa loner spesyal. Anba konmann Bondye ek Kris, nou sipli bann dimoun pour “les zot ganny rekonsilye avek Bondye.” (2 Kor. 5:20) Zeova pe servi nou pour atir dimoun ver li. Koumsa menm ki plizyer milyon dimoun dan plis ki 235 pei in arive ganny led pour annan en bon relasyon avek Bondye e annan sa lespwar pour ganny lavi eternal. (Tit 2:11) Avek devouman senser, nou envit “sa ki anvi, [pour] pran delo lavi gratwitman.” (Rev. 22:17) Lefet ki nou kontan nou responsabilite e fer li plennman, nou sirman kapab ganny dekrir konman en pep ki “zele pour fer dibyen.” (Tit 2:14) Aprezan annou vwar ki mannyer nou devouman pour fer sa ki byen i kapab atir lezot ver Zeova. En fason i atraver predikasyon.

IMIT DEVOUMAN ZEOVA EK ZEZI

3 Pour dekrir sa ki dominasyon Garson Bondye pou akonplir, Izai 9:7 i dir: “Se avek devouman ki Zeova bann larme pou fer sa.” Sa parol i montre ki nou Papa ki dan lesyel i enterese avek delivrans bann imen. Legzanp devouman Zeova i montre klerman ki sa travay ki nou’n gannyen avek li konman bann proklanmater i devret ganny fer avek tou nou leker e avek devouman. Sa gran dezir ki nou annan pour ed lezot konn Bondye i en fason pour reflekte devouman Zeova. Alor, konman bann ki travay ansanm avek Bondye, eski nou determinen personnelman dapre nou sironstans pour partisip plenman dan sa travay pour proklanm sa bon nouvel?—1 Kor. 3:9.

4 Egzamin osi devouman Zezi. I’n kit en legzanp parfe an rapor avek perseverans ek devouman

3. Ki lasirans nou gannyen atraver ‘devouman Zeova’?

4. Dan ki fason Zezi in kit en legzanp perseverans ek devouman dan predikasyon?

dan minister. Malgre bann gran lopoziyon, i ti gard son devouman dan predikasyon ziska lafen son lavi lo later. (Zan 18:36, 37) Determinasyon Zezi pour ed lezot konn Zeova ti vin pli for anmezir letan ti pe aprozé pour li ofer son lekor konman en sakrifis.

5 Par egzanzp, pandan lotonn lannen 32 N.L., Zezi ti donn legzanp konsernan en zonn ki ti annan en pye fig dan son plantasyon rezen ki pa ti raport okenn fri pour trwa-z-an. Apre ki i ti'n ganny demande pour koup sa pye fig, son zardinyen ti demann li en pe letan pour met fimyen avek sa pye. (*Lir Lik 13:6-9.*) Sa letan, zis en ptigin disip ki ti kapab ganny konte konman bann fri predikasyon Zezi. Me parey i ganny endike dan sa legzanp lo sa zardinyen, Zezi ti servi sa apepre sis mwan ki ti reste li pour entansifye son minister Zide ek Pere. Detrwa zour avan son lanmor, Zezi

5. Ki mannyer Zezi ti azir an armoni avek son legzanp konsernan pye fig?

ti pler pour son bann konpatriyot ki ti “bous zot zorey.”—Mat. 13:15; Lik 19:41.

6 Vi ki nou pe viv dan sa letan ki pli pros avek lafen, eski pa i enportan pour nou fer plis zefor dan predikasyon? (*Lir Danyel 2:41-45.**) Pa i en gran privelez ki nou Temwen Zeova! Nou sa sel group dimoun dan lemonn ki pe donn lespwar li-manite konsernan solisyon zot problem. Dan en zournal, en zournalis ti dir ki *napa larepons* pour

* Danyel 2:41-45: “⁴¹ Parey ou ti vwar ki lipye ek ledwa lipye ti en parti an larzil ki en potye i servi e en parti an fer, sa rwayonm li menm pou divize, me i pou annan kantmenm en pe lafors fer la-dan akoz parey ou’n vwar i ti annan fer melanze avek larzil mouye. ⁴² Kant a bann ledwa lipye ki ti en parti an fer e en parti an larzil mouye, sa rwayonm pou en parti for e en parti frazil. ⁴³ Parey ou ti vwar ki fer ti melanze avek larzil mouye, zot pou melanze avek bann desandans imen me zot pa pou atase avek kanmarad, sa enn avek sa lot, zis parey fer pa pe melanze avek larzil. ⁴⁴ Dan bann zour sa bann lerwa, Bondye lesyel pou etabli en rwayonm ki pa pou zanmen ganny detrir. Sa rwayonm li menm pa pou pas avek okenn lezot pep. I pou kraz e met en lafen avek tou sa bann rwayonm e li menm i pou dire pour en letan endefini. ⁴⁵ Lefet ki ou ti vwar en ros deta-se avek sa montanny non pa par lanmen zonm e i ti kraz sa fer, kwiv, larzil, larzan ek lor. Bondye li menm in fer konnen lerwa sa ki pou arive apre sa. Sa rev i vre e son enterpretasyon i diny konfyans.”

6. Akoz nou devret fer plis dan predikasyon?

sa keſtyon, “Akoz move keksoz i ariv avek bann bon dimoun?” I nou devwar ek privelez konman Kretyen pour donn dimoun ki pare pour ekoute la-repons Labib pour bann keſtyon parey. Nou annan tou rezon pour les nou ganny “pouse par les-pri” anmezir nou akonplir nou travay ki Bondye in donn nou. (Rom. 12:11) Avek benediksyon Bondye, ler nou pres avek devouman, nou kapab ed le-zot pour konn e kontan Zeova.

EN LETA LESPRI SAKRIFIS I ONOR ZEOVA

7 Parey legzanp zapot Pol i montre, dan nou minister nou kapab “mank sonmey, e mank manze.” (2 Kor. 6:5) Sa de lekspresyon i donn nou en lide ki savedir viv en lavi sakrifis e i fer nou mazin bann pionye ki predikasyon i premye plas dan zot lavi e ki an menm tan zot bezwen siport zot lekor finansyerman. Mazin osi bann misyonner devoue ki

7, 8. Ki mannyer en leta lespri sakrifis i onor Zeova?

donn zot lekor konman en sakrifis pour servi dan bann pei etranze. (Fili. 2:17, *NW*) Ki nou pou dir konsernan nou bann ansyen ki travay dir e ki pa manze ouswa mank sonmey pour pran swen avek troupo Zeova? I osi annan bann aze ek sa bann ki lasante pa tro bon ki fer zot mye pour asiste renyon e partisip dan predikasyon. Nou leker i ranpli avek lapresyasyon kan nou mazin tou bann servirer Zeova ki annan en leta lespri sakrifis. Bann zefor koumsa i annan lefe lo lafason ki lezot i vwar nou minister.

8 Dan en let pour Lincolnshire *Boston Target*, Langleter, en leker ki pa Temwen ti dir: “Dimoun pe perdi konfyans dan larelizyon . . . Ki sa bann pret legliz i fer lazournen antye? I pa konmsi zot sorti kot zot parey Zezi e al zwenn dimoun . . . Sel larelizyon ki paret enterese se Temwen Zeova, zot sorti se zot e al zwenn dimoun e zot senserman pres laverite.” Dan sa lemonn kot dimoun i

enterese zis avek zot prop lekor, nou leta lespri sakrifis i ede onor Zeova nou Bondye.—Rom. 12:1.

9 Me, ki nou kapab fer si nou paret pe perdi nou devouman pour nou minister? I pou byen si nou reflexir lo sa ki Zeova pe akonplir atraver predikasyon. (*Lir Romen 10:13-15.*) Pour en dimoun ganny delivre fodre i pe kriy o non Zeova avek lafwa, me dimoun pa pou kapab fer sa si nou pa pres avek zot. Ler nou konpran sa, sa pou motiv nou pour reste zele pour fer dibyen e pour proklanm sa bon nouvel lo Rwayonm plennman.

BON KONDWIT I ATIR DIMOUN VER BONDYE

10 Menm si devouman i enportan dan minister, zis devouman tousel pa ase pour atir lezot ver Bondye. Dezyenm laspe enportan pour pres avek devouman pour atir dimoun ver Bondye se

9. Kwa ki kapab motiv nou pour reste zele pour fer dibyen dan predikasyon?

10. Akoz i kapab ganny dir ki nou bon kondwit i atir dimoun ver Zeova?

nou kondwit konman Kretyen. Pol ti met lanfaz lo lenportans nou kondwit kan i ti ekrir: “Nou pa oule plas okenn lobstak devan personn, pour ki nou servis pour Bondye pa ganny blanmen.” (2 Kor. 6:3) Nou parol ankourazan e bon kondwit i kapab fer lansennyman Labib pli atiran, i atir lezot ver ladorasyon Zeova. (Tit 2:10) Anfet, souvan nou antann bann bon rezilta kot bann dimoun senser in obzerv nou kondwit Kretyen.

11 Menm si nou rekonnet ki nou aksyon i kapab annan en bon lefe lo lezot, lekotrèr osi i posib. Alor, ki swa nou kot travay, kot lakour ouswa kot lekol, nou pa oule ki personn i trouv okenn defo avek nou minister ek nou kondwit. Si nou fer pese volonterman, son konsekans i kapab fatal. (Ebr. 10:26, 27) Atraver lapriyer, egzamin sa ki nou pe fer e lefe ki nou fason viv i annan lo lezot. Anmezir standar moral sa lemonn i kontinyen deteryore, bann dimoun

11. Akoz atraver lapriyer nou devret egzamin lefe nou kondwit?

senser pou sirman “vwar ladiferans . . . ant enn ki pe servi Bondye ek enn ki pa’n servi li.” (Mal. 3:18) Wi, nou bon kondwit i zwe en rol enportan pour rekonsilye bann dimoun avek Bondye.

12 Ler i ti ekrir bann Korentyen, Pol ti montre zot ki i ti’n eksperyans soufrans, difikilte, ganny bate e met dan prizon. (*Lir 2 Korentyen 6:4, 5.*) Kan nou eksperyans bann leprev ki teste nou lafwa, nou landirans i kapab ed lezot aksepte laverite. Pour donn en legzanp: En pe letan pase, i ti annan en zefor ki ti pe ganny fer pour elimin Temwen Zeova dan en rezyon Angola. De Temwen ek 30 dimoun ki ti enterese e ki ti pe asiste renyon ti ganny rasanble ansanm. Bann zabitan sa landrwa ti ganny rasanble pour gete anmezir bann opozan ti bat sa bann inosan ziska zot ti sennyen. Menm bann madanm ek zanfand osi ti sibir sa kriyote. Sa bann dimoun ti fer sa pour ki person pa ekout

12-14. Ki mannyer lafason ki nou fer fas avek leprev i annan lefe lo lafason ki lezot i vwar nou minister? Donn legzanp.

Temwen Zeova. Me zis mazin sa, apre sa bate an piblik, en kantite dimoun dan sa kominote ti apros bann Temwen e demann zot en letid Labib! Depi sa, sa bon nouvel in kontinyen propaze, i annan en kantite ogmantasyon ek bokou benediksyon.

13 Sa legzanp i montre lefe ki nou pozisyon ferm pour defann bann prensip Labib i kapab annan lo lezot. Petet nou kapab pe mazine konbyen dimoun ki ti rekonsilye avek Bondye aköz kouraz zapot Pyer ek lezot zapot. (Akt 5:17-29) Dan nou ka, nou bann kanmarad lekol, koleg travay ouswa nou manm fanmir i kapab aksepte laverite kan zot vwar sa pozisyon ferm ki nou pran pour sa ki drwat.

14 La konmela, serten nou bann frer pe eksperyans persekisyon. Par egzanzp, Larmeni, apepre 40 frer i dan prizon aköz zot pa pran okenn kote politik, e plizyer douzenn lezot i riske ganny anprizonnen dan bann mwan ki pe vini. Leritre, 55 serviter Zeova i dan prizon, serten i plis ki 60 an. Sid

Kore, apepre 700 Temwen i dan prizon akoz zot lafwa. I fer pros 60 an depi ki sityasyon i koumsa laba. Annou priye ki fidelite sa bann frer ki pe ganny persekite dan plizyer pei i rann glwar Bondye e ed sa bann ki kontan ladrwatir pour pran pozisyon pour vre ladorasyon.—Ps. 76:8-10.

15 Lefet ki nou viv en lavi onnet osi i kapab atir dimoun ver laverite. (*Lir 2 Korentyen 6:4, 7.*) Par egzanp, get sa leksperyans: En ser ti pe met larzan dan en masin ki donn tiket bis kan en dimoun ki i ti konnen ti dir li ki i pa vo lapenn pey sa tiket akoz i pa ti pe al tro lwen. Sa ser ti eksplike ki i ti byen pour li pey tiket, menm si i ti pe zis al aret prosen bèstop. Apre sa, son zanmi ti debarke. Ler i ti vwar sa, sa drayver ti vire e demann li, “Ou en Temwen Zeova ou?” Sa ser ti dir, “Wi, me akoz ou demann sa?” Drayver ti dir: “Mon’n tann ou konversasyon konsernan pey tiket e mon konnen ki

15. Donn legzanp pour montre ki mannyer lonnekte i kapab atir dimoun ver laverite.

Temwen Zeova i parmi sa ptigin dimoun ki fer sa e ki onnet dan tou keksoz.” Detrwa mwan pli tar, en zom ti apros sa ser kot lasal e dir, “Ou rapel mwan? Mwan menm sa drayver bis ki ti koz avek ou konsernan pey tiket. Apre ki mon ti’n obzerv ou kondwit, mon ti deside konmans etidye Labib avek Temwen Zeova.” Nou repitasyon konman bann dimoun onnet i onor nou konman bann evan-zelizater ki diny konfyans.

TOUZOUR DEMONTRE BANN KALITE KI ONOR BONDYE

16 Nou osi zwe en rol pour atir dimoun ver Zeova kan nou demontre bann kalite parey pasyans, lanmour ek labonte. Serten ki’n obzerv nou i kapab annan sa dezir pour aprann konn Zeova, son plan ek son pep. Latitid ek kondwit bann vre Kreyen i diferan avek sa bann ki pretann zot servi Bondye an deor, me anndan, zot pe zis azir

16. Akoz bann kalite parey pasyans, lanmour ek labonte i tous leker lezot? Donn legzanp.

konman bann ipokrit. Serten sef relizye in vin ris akoz zot in anbet, servi larzan bann parwasyen pour aste bann lakaz ser ek loto e dan en ka, i ti menm annan enn ki ti aste en lakaz lisyen ki ti annan erkonn ladan. Sirman, bokou ki pretann ki zot disip Kris napa okenn lanvi pour ‘donn pour nanryen.’ (Mat. 10:8) Plito, parey bann pret egois dan letan lontan Izrael, zot “ansennyen zis pour en pri” e lamazorite sa ki zot ansennyen pa baze lo Labib. (Mik. 3:11) Sa bann aksyon ipokrit i pa rekonsilye personn avek Bondye.

17 De lot kote, bann vre lansennyman Kretyen ek bann bon aksyon anver nou prosen i tous leker. Par egzanp, en fwa ler i ti pe pres portanport, en frer pionye ti ganny pouse par en vev aze. I ti dir ki ler sa frer ti’n pez son sonnet, i ti lo en lesel dan lakwizin pe esey ranplas en glob. Sa frer ti dir: “I danze-re pour ou fer sa ou tousel.” Sa pionye ti apre sa

17, 18. (a) Dan ki fason Zeova i ganny onore par nou bon aksyon? (b) Kwa ki motiv ou pour zele pour fer dibyen?

sanz sa glob e kontiny son semen. Kan garson sa madanm ti tann sa ki ti'n arive, i ti sitan enpresyonnen ki i ti al rod sa frer pour demontre son lapresyasyon. Avek letan, sa garson ti aksepte en letid Labib.

18 Akoz ou determinen pour kontinyen fer dibyen? Petet akoz ou konnen ki ler nou devoue dan nou minister e viv an armoni avek lavolonte Bondye, nou onor Zeova e sa i kapab ed lezot pour ganny delivre. (*Lir 1 Korentyen 10:31-33.*) Lanmour pour Bondye e pour nou prosen ki pous nou pour annan devouman pour fer sa ki byen, pour pres sa bon nouvel e konport nou konman bann vre Kretyen. (Mat. 22:37-39) Si nou zele pour fer dibyen, nou pou ganny bokou lazwa ek satisfaksyon depi la konmela. Deplis, nou kapab esper avek enpasyans sa zour kan tou limanite pou demontre devouman pour vre ladorasyon par onor Zeova, nou Kreater.